

Inatsisartut Suleriaasianni § 33 naapertorlugu aalajangiiffigisassatut siunnersuut imaattoq matumuuna saqqummiuppara:

Meeqqat 18-inik ukioqalernissami tungaanut pisortat ingerlataannik angalatitsiviit aqquutigalugit angalasussaattillutik meeqqatut akeqalernissaat, aningaasatigut qanoq naleqassanersoq Naalakkersuisut misissuinissaannik Inatsisartut aalajangiiffigisassatut siunnersuut. Misissuineq meeqqat akikinnermik angalasarnerannut malittarisassat allanngortinnissaannik tunngaviliissaaq, kingusinnerpaammilu UPA2026-mi inatsisartunut saqqummiunneqassalluni.

(Inatsisartunut ilaasortaq Jens NapãtôK, Naleraq)

Tunngavilersuut:

Nunatsinni angalaniarneq akisoorujussusoq tamaavitta ilisimavarput. Air Greenland aammalu Arctic Umiaq Line nunatta tamakkiisumik pigivaat, taamaattumik Naleqqamiit akuerisinnaangilluinnarparput Naalakkersuisut akinik taamak amiilaarnartigisunik akuersaaginnartut.

Nunatsinni isertitakitsut inuuniarnermikkullu ilungersortut amerlaqaat. Air Greenland ukiut tamaasa millioninik taamannanik sinneqartoortuartoq nuannaarutigineqartuartoq, soorlu ukioq kingulleq 83,4 mio. kr.-inik sinneqartoortut¹ Naleqqamiit isiginngitsuusaaginnarsinnaangilarput.

Meeqqanut, Inuusuttunut, Ilaqutariinnullu Naalakkersuisoqarpugut, Meeqqat oqaaseqartartoqarpugut sorpassuartigullu meeqqanut atugassarititaasunut pitsanngorsaasussanik sulisoqarpoq, taamaattumik Naleqqamiit pissusissamisoorsorivarput, sualummik angalaniarneq taamak akisoreertigisoq meeqqat 18-iliinissami tungaanut meeqqatut akeqalernissaannik Naalakkersuisut misissuissasut.

Pisortanut aningaasatigut allaffissornikkullu kingunerisassat

Misissuineq AC-fuldmægtigip ukiumut akissarsiassaasa affaanik naleqassaaq, tassa 250.000 kr.

¹ <https://kl.sermitsiaq.ag/inuusutissarsiutit/naatsorsuutigisamit-air-greenland-sinneqartoorteqarnerunngilaq/2083610>



Namminersorluni inuussutissarsiuteqarnermut aningaasatigut allaffissornikkullu kingunerisassat

Qanorluunniit namminersortunut aningaasatigut iluaqutaassaaq, billetsimmi akikillisussaammata.

Innuttaasunut aningaasatigut allaffissornikkullu kingunerisassat

Innuttaasunut iluaqutaasussamik sunniuteqassaaq, angalasinnaasummi amerlissussaammata.